



# Պարույր Սևակ

## Սիրտս նման է

Ա՛խ, սիրտս նաև նման է կարծես...

Նման է կարծես նա մի թութակի,

Որ ո՛ղջ ժամանակ նույն բանն է ասում.

-Ես քեզ եմ ուզում...

Նման է կարծես նա մի ջութակի,

Որ միա՛կ լարով յոթ լարից շատ է

Ազդում ու հուզում...

Նման է կարծես մի ջինջ վտակի,

Որ տարբե՛ր հունով, բայց դեպի քեզ է

Շարունակ վազում...

Նման է կարծես մի պատաստուկի,

Որ գոտու նման փաթաթվում է քեզ

Եվ շա՛տ է սազում...

Նման է կարծես մի խոր հատակի,

Որ ուրիշներին փետուրի նման պահում է վերև

Եվ միայն քե՛զ է իր խորքը սուզում...

04.II.1954թ.

Մոսկվա